



partii naleraq

UKA 2016/108-01

25-10-2016

**Innuttaasut ilinniagaqarnermik allagartaqanngitsut inuttut piginnaasaqarfigivilersimasaat nammineerlutillu piginnaanerilersimasaat pisortatigoortumik nalunaarsorneqarnissaat, ataqatigiisillugit aqqissuuneqarnissaat, suliffeqarfeqarnermilu suliallit illuatungeriit atuinerulernissaat anguniarlugu, Naalakkersuisut sulisoqarnermut tunngasuni attuumassusilinnik suleqatiserinninnissaannik oqaloqatiserinninnissaannillu peqquneqarnissannik, anguniagaasalu inerneru kingusinnerpaamik UPA18-mi nassuiaammi saqqummiunneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Sara Olsvig, Inuit Ataqatigiit)

Inatsisartunut ilaasortaq Sara Olsvig, Inuit Ataqatigiinneersup siunnersuutaa Partii Naleraq sinnerlugu imannak oqaaseqarfigissuarput.

Siunnersuut piviusungortinneqassappat takorloorsinnaavarput, piffissarujussuaq immaqalu siunnersuuteqartup, aningaasatigut kingunerisassaannik missingersuutaanit akisunerusinnaanera takorloorneqarsinnaasoq naatsorsuutigisinnaavarput.

Tassami inuit ilinniartitaaneq naliginnaasoq aqqutigalugu ilinniakkamut aaliangersimasumut allagartartaarsimannngitsut sinerik tamaat siammarsimasut, ilarparujussuulu suliffissaaleqisut amerlasoorujussuit tamaasa inuttut piginnaasaqarfigivilersimasaasa pisortatigoortumik nalunaarsorneqarnissaat ajornakusoorsinnaasoq takorloorsinnaangatsigu.

Taamaammat uagut orniginartinneruarput, inuusuttorpassuit ilinniakkamik suli aallartitsisimannngitsut suliffissaaleqisullu ilinniagaqalersinnaanerisa kalaallisut oqaatsivut kultur-erpullu aallaavigalugit, minnerunngitsumillu nunatsinni pissutsit piviusut aallaavigalugit ilinniartitsinerit piaartumik aallartsinneqartariaqartut.

Tassani kalaaleqativut maani najungaqartut kalaallisuinnaq oqaatsinik atuisut amerlanerpaat uani pineqarmata. Taakkuummatami ilinniarnissaminnut mattunneqartartut, tassagoq danskisut piginnaasaat naammagineqanngimmata.

Ilinniartitaaneq uani qulequttami eqqartorneqanngikkaluartoq, taamaattoq Partii Naleqqamiit assorujussuaq pingaartipparput ilinniartitaanerup Kalaallit Nunatsinni pissutsit piviusut aallaavigalugit aallunneqartuarnissaa eqqaasitsissutiguassallugu.

Tassanilu suliasaqarfiit suliffiillu assassorluni ingerlataqarfiusut eqqarsaatigineruagut.

Soorunami Partii Naleqqamiit qaffasissumik oqaatsinillu allanik ilinniagaqartuarnissaq aamma pingaartipparput, kisiannili-uku inuusuttut oqaatsinik allanik annerusumik ilinniagaqarsimanngitsut ilinniagaqalersinnaanerisa periarfissinneqarnissaat eqqarsaatigigipput.

Soorlu tamanna aamma inimi maani oqallitarnitsinni oqaatiguaripput.

Aamma isumaqarpugut nunani allani nunarput pillugu ilisimatuussutsikkut misissukkat paasisallu tamarluinnaasa upperalugit issuarlugillu pisarnissaat mianersuuttariaqartut, tassami maani nunatsinni pissutsit piviusut allaffissornerinnakkut atuagarsornerinnakkullu tamakkiisumik sukumiisumillu paasissutissiissutigineqarsinnaanerit arlalitsigut apeqquserneqarsinnaasarmat, tassami piviusut ulluinnarni inunnut maani atugassarititaasut amerlasuutigut ilisimatuunut atugassarititaasunit allaalluinnartarmata.

Taama naatsumik oqaaseqarluta Naalakkersuisut akissuteqaataat tusaatissatut tiguarput.